

PAULO TỸ CARTA HAN: ÉFESO TÁ KE AG MỸ CARTA

¹ Paulo tỹ rá vễ. Isỹ cidade tỹ Éfeso tá ke ag mỹ rán hã vễ. Jesus Cristo vỹ inh fễg', sỹ tỹ ti apóstolo jễ jé, Topễ tỹ isỹ apóstolo han kỹ. Hã kỹ sóg ăjag mỹ carta tag rán mũ. Topễ tũ vỹ tỹ ăjag nỹtĩ, kỹ ăjag tóg cidade tỹ Éfeso tá Jesus to vễnhmãn tĩ. Jesus Cristo tovãnh tũ ăjag tóg nỹtĩ.

² Ễg jóg tỹ Topễ jé ăjag tar han, ti jé ăjag krĩ kuprăg, ễg Senhor tỹ Jesus Cristo ti ke gé.

Cristo tỹ ễg mỹ vĩ há han mũ

³ Ễg kar jé Topễ mỹ vĩ há han, ễg jé ti mỹ agradercer hé, ễg Senhor tỹ Jesus Cristo panh mỹ. Ễg tỹ Cristo ki ge kỹ nỹtĩn kỹ tóg ễg mỹ kanhkã ti ven sór mũ, Topễ ti. Tá tóg ễg mỹ nén (ũ) há kar ven sór mũ gé, kỹ nén ũ tóg ễg mỹ tũ' henh ke tũ pễ nĩ, tá. Hã jé tóg ễg mỹ ă kuprĩg jễnễ, ễg tỹ ti tugrĩn nén (ũ) há kar ve jé.

⁴ Văsỹ tóg ễg kuprễg ja nĩ, ă tỹ nén (ũ) kar han ke to hã tóg ễg kuprễg ja nĩ, Topễ ti, ễg tỹ tỹ ti tũ nỹtĩ jé, Cristo tugrĩn. Ễg tỹ ti ri ke nỹtĩ jé tóg ễg kuprễg, ễg tỹ kygnễg tũ nĩ jé. Ti fe vỹ tỹ ễg nỹtĩ.

⁵ Hã kỹ tóg ễg kuprễg, ễg tỹ tỹ ti krễ nỹtĩ jé, Jesus Cristo tugrĩn. Ti hã ne vễsóg ki ễg kuprễg ke to jykrén ja nĩgtĩ'.

⁶ Ễg tỹ ti mỹ vĩ há han jé tóg ễg kuprễg. Ừn mág vỹ tỹ ti nĩ, ễg jagăgtãn tóg tĩ, hã kỹ tóg há tĩnh mũ,

ẽg tỹ ti mỹ agradecer hen kỹ. Ti kósin pir tigrĩn ẽg tóg tỹ ti fe pẽ nỹtĩ.

⁷ Ti hã ne ẽg kren han tĩ', ti kyvénh tỹ ẽg jagfy kãkutẽ ja nĩn kỹ. Tỹ tóg ẽg tỹ Topẽ vĩ mranh ja ẽn tỹ tũ' he ja nĩgtĩ, ã kyvénh tỹ. Topẽ tỹ ẽg mỹ nén ù há han hã vẽ.

⁸ Hã ra tóg tũ' henh ke tũ nĩ, ti tỹ ẽg mỹ nén nĩm ja tag tĩ. Krĩ há ti nĩ, nén kar to jykrén há han ti tĩ, Topẽ ti.

⁹ Vãsỹ tóg to jykrén ja nĩgtĩ, kỹ tóg ùri ẽg mỹ tó mũ sir, ti tỹ Cristo tigrĩn nén han sór mũ ti.

¹⁰ Cristo tỹ tóg ùn mág han sór mũ, vėnh kar kri ke, kanhkã tân ag kri ke, ga kri mũ ag kri ke gé, kỹ vėnh kar vỹ tỹ ti krēm ke nỹtĩnh mũ. Povo pir ri ke ag nỹtĩnh mũ, kurã ẽn kã. Tĩ kurã ki tóg ti tỹ ùn mág han sór mũ ha, Topẽ ti.

¹¹ Ẽg tỹ Cristo ki ge kỹ nỹtĩ kỹ ẽg tóg venh ke mũ gé, Topẽ tỹ ã tũ ag mỹ nén ven ke mũ ẽn ti. Ẽg tỹ ẽn ve jé Topẽ tóg ẽg kuprẽg ja nĩ, ti tỹ ẽg kuprẽg to jykrén kỹ. Nén kar to tóg jykrén há han tĩ, vėsóg ki, kỹ tóg ẽg kuprẽg to jykrén ja nĩ gé,

¹² Ẽg tỹ Jesus hã pin kỹ ti ki ẽvãnh jé. Ẽg tỹ ti ki ẽvãnh kar kỹ ẽg tóg vãhã Topẽ mỹ vĩ há han ki kanhró nỹtĩ. Tĩ hã ki ẽvãnh kỹ ẽg tóg Topẽ to: “ùn mág vỹ tỹ ti nĩ,” he' he tĩ sir.

¹³ Ti kãme mẽ ja ãjag tóg nĩgtĩ gé, vėnh vĩ há ẽn, ti tỹ ẽg krenkren han sór mũ kãme. Ti kãme ẽn mẽ kỹ ãjag tóg ti ki ge jẽg. Kỹ Topẽ tóg ãjag mỹ ã kuprĩg jẽnẽ. Tỹ tóg ãjag jagrẽn há han. Tĩ tỹ ãjag nĩgĩg hã vẽ, ã kuprĩg tỹ.

¹⁴ Ẽg jagrẽ tigrĩn ẽg tóg ki kanhró nỹtĩ, ti tỹ ẽg mỹ ã tỹ ẽg mỹ nén tó ja ẽn ven kãn ke ti. Kejẽn ẽg

tóg venh ke mũ, ha vemnĩ, ãg tỹ tỹ ti tũ nỹtĩn kỹ, kỹ tóg ãg mỹ sér tĩnh mũ. Kỹ ãg tóg ti mỹ vĩ há han ke mũ, ti tỹ tỹ ãn mág jẽn kỹ.

Paulo tỹ Topẽ mré vĩ mũ

¹⁵ ãjag tỹ ãg Senhor tỹ Jesus ki ge mẽ kỹ inh nĩ, ãjag tỹ jagnẽ to há nỹtĩ ti ke gé, ãjag tỹ ã tỹ Jesus ki ge kỹ nỹtĩ ag kar to há nỹtĩ ti.

¹⁶ Hã kỹ sóg ãjag to Topẽ mỹ: “há ti nĩ,” he tĩ. Ajag to ti mré vēmén to krónh ke vãninh inh nĩgtĩ.

¹⁷ ãg Senhor tỹ Jesus Cristo panh mré sóg vēmén tĩ, ãg jóg mré, ãn mág pẽ ãn mré. Ti mré vēmén kỹ sóg ti mỹ: “ã kuprĩg tỹ ag krĩn nĩ,” he tĩ, “ã kuprĩg tỹ ag mỹ vẽn kãmén há han nĩ, ag tỹ ã ki kanhrãn há han jé,” he sóg tĩ.

¹⁸ “Ha ag mỹ krĩ há nĩm. Ha ag kanẽ tar han, ag tỹ ve há han jé. Ag kuprẽg ja ã tóg nĩ, ã tỹ ag mỹ nĩm jé, ã tỹ nén tó ja ãn ti. Ag tỹ tỹ ã tũ nỹtĩn kỹ ã tóg ag mỹ ã tũ vin ke mũ, ã tỹ nén tó mũ ãn ti, hã ra tóg e tãvĩ nỹtĩ, ã tỹ ag mỹ nén vin ke mũ ãn ti.

¹⁹ Tar tãvĩ ã tóg nĩ gé, kỹ ã tóg ag mỹ nén kar há han tĩ tag ki, tá ke gé, ag tỹ ã ki ge kỹ nỹtĩn kỹ. Ag mỹ tag kãmén nĩ,” he sóg tĩ, Topẽ mỹ.

²⁰ Ti tar tãvĩ nĩn kỹ tóg Cristo ter kar kỹ ti rĩn mãn ja nĩgtĩ gé. Kỹ tóg ti mỹ: “ha inh pẽgja tá nĩ,” he ja nĩ gé, kanhkã tá.

²¹ Ti tỹ tóg pã'i mág han, kỹ tóg tỹ pã'i kar ag kri ke jẽ, kanhkã tãn kar ag kri ke, ãg tỹ ãn vэг tũ kar ag kri ke, ãn tar ag, ãn mág ag. Tỹ tóg ag kri ke kar jẽ, Cristo ti, kỹ ti jiji vĩ vẽn kar ag jygji kãfór nĩ gé, ãg tỹ ãn tó mũ ag jygjy, ãg tỹ kar kỹ ãn tónh ke ag jygji mré hã.

22 Kŷ Topě tóg ti krēm vēnh kar vin kãn. Kŷ tóg tŷ vēnh kar kri ke jě sir, Cristo ti. Kŷ tóg tŷ ěg kri jě nŷ sir, ěg tŷ tŷ ti tũ nŷtĩn kŷ.

23 Jãvo ěg tóg ti há ri ke nŷtĩ gé sir, kŷ ěg tóg tŷ ũn pir nŷtĩ jagně mré, Jesus ti mré ke gé. ěg há vŷ ã pir mŷ tŷ nén ũ tũ nŷ. ěg krĩ mré tóg tŷ nén ũ pir nŷ, ěg há ti. Ri ke ti nŷ, ěg tŷ Jesus mré tŷ ũn pir nŷtĩ ti. Ti hã vŷ nén kar rĩr han tĩ, Jesus ti.

2

Ti ki ge kŷ ěg rĩnrĩr nŷtĩ

1 Vãsŷ ãjag tóg tóg nŷgme ki vár ke mũ vē, ãjag tŷ ti vŷ ki króm ja tũ nŷn kŷ, ãjag tŷ ti vŷ mranh ja nŷn kŷ.

2 ěn kã ãjag tóg ěprã ke ag jykre pãno jagma mũ ja nŷgtĩ, Nén-Kórég pã'i mág ěn tŷ ãjag krĩn kŷ, ũ tŷ nén ũ ũ tãn ag kri pã'i ěn tŷ ãjag krĩn kŷ. Tŷ ti krĩg tãn ag kri pã'i nŷ gé. ěn vŷ tŷ ũ tŷ Topě vŷ mranh tĩ ag jagrě nŷ mŷr.

3 Vãsŷ ěg tóg tŷ ti tũ nŷtĩ ja nŷgtĩ gé, ti krě ag ri ke. ěn kã ěg tóg ěg tŷ nén to én mũ ěn han ja nŷgtĩ, ěg tŷ nén to jykrén mũ kar ěn ti. Kŷ Topě tóg ěg vóg kónãn mũ vē, ti tŷ ag vóg kónãn ke ěn ri ke.

4 Hã ra Topě tóg ěg jagãgtãn pě han. ěg to tóg há tãvĩ nŷ, kŷ ěg tóg tŷ ti fe nŷtĩ.

5 ěg tŷ ti vŷ mranh ja nŷn kŷ ěg tóg vēser ri ke nŷtĩ ja nŷgtĩ, hã ra tóg ěg rĩnrĩn mãn ja nŷgtĩ, Cristo mré. Ti tŷ ěg jagãgtãn kŷ tóg ěg krenkren han ja nŷgtĩ.

6 Cristo mré tóg ěg rĩnrĩn mãn ja nŷgtĩ gé. Kanhkã tá tóg ěg tŷ ũn mág han ke mũ, Jesus Cristo mré hã.

7 Tag ve kŷ vēnh kar vŷ ki kanhró nŷtĩnh mũ, Topě tŷ Jesus Cristo tugrĩn ěg to há tãvĩ nŷn ki. Hã

jé tóg ãg mÿ nén ù há ên ven ke mÿ. Tÿ' he jãvãnh ti nÿ, ti tÿ ãg mÿ nén ven ke ti. Ti tÿ Jesus Cristo to há nÿn ký tóg ãg mÿ nén ù há kar ven ke mÿ.

⁸ Ha vé, ti tÿ ãg jagãgtãnh ký tóg ãg kren han ja nÿgtÿ, ãg tÿ ti ki ge ký nÿtÿnh ký. ãg tÿ vêsóg ki vënh kren han pijé'. Topê tÿ ãg kren han ja vë mÿr. Ký tóg ti tÿ ãg mÿ presente han ri ke nÿ.

⁹ ãg vãsãnh pijé'. ãg tÿ ãg vãsãnh to kren tÿ ra ãg Topê mÿ: “há inh nÿ, vãsãnh ja inh nÿ, há ký sóg kren mÿ,” henh mÿ vë. Há ra ãg pi(jé) ãg vãsãnh to kren ke mÿ'. Ti tÿ ãg jagãgtãnh vë mÿr.

¹⁰ Ti há ne ãg han mãnh ja nÿgtÿ'. Jesus Cristo tÿ tóg ãg han ja nÿgtÿ, ãg tÿ vënh jykre há han jé. Topê vÿ ãg mÿ vënh jykre há tag nÿm kãnh, ãg tÿ vënh jykre tag jagma mÿ jé.

ãg tÿ Cristo mré tÿ ùnh pir nÿtÿ

¹¹ ãg tÿ vãsÿ nén han tÿ ja ên mÿ êkré. Fóg vÿ tÿ ãg nÿtÿ, Judeu ag tÿ ù to: “ùnh gré junun fãr kym ja tÿ ag,” he mÿ ên ag vÿ tÿ ãg nÿtÿ. Jãvo Judeu ag vÿ ãg gré junun fãr kym tÿ. Há ra ãg fãr vÿ tÿ êprã ke nÿ.

¹² ù tÿ kym tÿ ag jãvo ãg tóg vãsÿ Cristo ki kagtÿg ja nÿtÿgtÿ, ký ãg pi(jé) tÿ Israel ag mré ke nÿtÿ ja nÿgtÿ', vãsÿ. Topê tÿ Israel jóg'jóg ve ag mré nén ù to jykrén mÿ ên ki kagtÿg ja ãg tóg nÿtÿ gé, Topê ki kagtÿg ja ãg tóg nÿtÿgtÿ gé, ký ãg tóg Topê tÿ ãg mÿ nén ven ke mÿ tag ki kagtÿg ja nÿtÿgtÿ gé.

¹³ Ên kã tóg ãg mÿ kuvar gy nÿ ja nÿgtÿ, Topê ti. Ùri tóg ãg mÿ kakó nÿ ha, Topê ti, ãg tÿ Jesus Cristo ki ge ký nÿtÿnh ký. Ti tÿ ãg jagfy ã kyvënh kujënh ja tugrÿnh tóg ãg mÿ kakó nÿ ha.

14 Ūri ěg tóg tŷ povo pir ri ke nŷtŷ, Judeu ag, fóg ag, kanhgág ag. Topě hã ne ěg tŷ jagně to há nŷtŷ tag han'. Jagně fyn kŷ ěg tóg nŷtŷ ja nŷgtŷ, hã ra tóg vãfynyn ěn kókén, Jesus ter kŷ. ěg tŷ tóg povo pir ri ke han, ěg tŷ jagně kato vãsãn mãn tũ nŷ jé.

15 Topě tŷ vãsŷ Judeu ag jyvĕn tŷ ěn tŷ tũ' he ja tóg nŷgtŷ, ti tŷ ag jyvĕn kar ěn tŷ. Ā ter tigrŷn tóg tŷ tũ' he ja nŷgtŷ, ti tŷ ěg mŷ ũ tãg nŷm jé sir. Nén ũ régre tŷ tóg ũn pir han ja nŷgtŷ, ũ tãg, ěg tŷ jagně kato vãsãn mãn tũ nŷ jé. Topě tŷ nén to jykrén mŷn hã vĕ. Cristo tigrŷn tóg ěg tŷ ũn pir han, ěg tŷ tŷ vĕnh kanhkã pir nŷtŷ jé.

16 Cristo vŷ Ā ter kŷ Topě tŷ ěg kar to há nŷ han, Judeu mré Judeu tũ ag to. Ti tŷ cruz to sa kŷ tóg Topě tŷ ěg kato tĕ ěn tŷ tũ' he kãn ja nŷgtŷ.

17 Jesus tŷ nén han jan hã vĕ. Kŷ tóg Topě tŷ ěg to há nŷ tag tó ja nŷ, ājag mŷ, ājag tŷ tŷ Judeu tũ ra, ěg mŷ ke gé, ěg tŷ tŷ Judeu nŷtŷn mŷ.

18 Ti tigrŷn ěg tóg ěg jóg tŷ Topě mré vĕmén tŷ ha, ājag, ājag tŷ tŷ Judeu tũ ra, ěg ke gé, ěg tŷ tŷ Judeu nŷtŷ ag ke gé. Ti kuprŷg vŷ tŷ ũn pir nŷ, hã tŷ ěg kar tóg ti mré vĕmén tŷ.

19 Hã kŷ ājag kórég tũ nŷtŷ ha. Ājag pi(jé) tŷ ěmã ũ tá ke nŷtŷ ha', ti mŷ, ājag tŷ tŷ fóg nŷtŷ ra, ājag tŷ tŷ kanhgág nŷtŷ ra ke gé. ěg mré ke vŷ tŷ ājag nŷtŷ ha, Topě tũ vŷ tŷ ājag nŷtŷ ha. Topě krĕ vŷ tŷ ājag nŷtŷ ha.

20 Topě jo ĩn ri ke vŷ tŷ ěg nŷtŷ. Ti nŷna runrur ri ke vŷ tŷ apóstolo nŷtŷ, Topě vŷ tó tŷ ag mré. Ti nŷna tĕj ri ke vŷ tŷ Jesus Cristo nŷ. Ti kuge ri ke vŷ tŷ ājag nŷtŷ, ěg mré.

21 Īn nūna tugarīn ĩn tóg jē nī, kŷ tóg komēr hā kar kŷ jēnh mū. Ti kar kŷ jē kŷ tóg tŷ ěg Senhor tū jē sir.

22 Cristo vŷ komēr hā ti han mū, ĩn kar ri ke ti, hā vŷ: ěg, he mū. Kŷ Topē kuprīg vŷ krēm ěmān nī, ěg kākā. Ũ tŷ Jesus ki ge mū ag to ken hā vē.

3

Paulo tŷ fóg mré kanhgág ag mŷ Jesus kāmén

1 Hā kŷ sóg Topē mré vī tī, inh, hā vŷ: Paulo, he mū. Se kŷ inh jé, Jesus Cristo tugarīn. Isŷ ājag to há jēn kŷ sóg se kŷ jē, isŷ ũ tŷ Judeu jykre han tū kar ag to há jēn kŷ.

2 Ājag hŷn tóg Topē tŷ isar han, mū ěn mē. Isŷ ājag ki rīr jé tóg isar han, isŷ ũ tŷ Judeu jykre han tū ag ki rīr jé.

3 Topē ne inh mŷ ā tŷ vāsŷ nén to jykrén mū ěn tó', hā ra ěg tóg ki kagtīg ja nŷtīgť. Vāhā tóg inh mŷ tó mū ha', hā kŷ sóg ājag mŷ kāmén sī han huri, Topē tŷ nén ũ tág to jykrén mū ěn ti.

4 Ājag tŷ inh vēnh rán tag ve kŷ ājag tóg venh ke mū sir, inh jykre ti. Cristo vŷ nén ũ tág han jé kātīg ja nī, ěn ki kanhró sóg nī.

5 Ti tŷ inh mŷ tag tó to hā ag tóg ki kagtīg ja nŷtīgť, ěg jóg'jóg ag, ěprā ke kar ag. Ũri tóg ěg mŷ tó mū, Topē ti, ā kuprīg tŷ. Apóstolo ag mŷ tóg tó mū ha, ũri, ti tū ag mŷ, ěg jyvěn tī ag mŷ ke gé.

6 Ti tŷ ěg mŷ nén ũ tág tó mūn hā vē, ha mē. Vāsŷ Topē tóg Judeu ag hā mŷ vī há han ja nī. Ũri tóg fóg ag mŷ, kanhgág ag mŷ vī há han mū ha, Judeu ag mré. ěg kar vŷ tŷ Jesus Cristo há ri ke nŷtī ha, ěg tŷ ti ki ge kŷ nŷtīn kŷ. Topē tŷ Judeu ag mŷ nén tó mū

ẽn, ẽg tỹ Jesus Cristo tugrĩn nén venh ke mũ ẽn ve kãn jé ag tóg ke mũ gé, ẽg mré, fóg ag, kanhgág ag. Û tỹ Jesus ki ge kỹ nỹtĩ ag hã vỹ venh ke mũ.

⁷ Tag to Topẽ tóg inh mỹ: “ha fóg kar ag mỹ, kanhgág kar ag mỹ tónh tũg,” he ja nĩgtĩ, kỹ tóg tag to isar han. Ti tar nĩn kỹ tóg isar han, inh rãnrãj to.

⁸ Topẽ tũ kãsir ag kar jakrẽm inh nĩ, hã ra tóg isar han, sỹ fóg ag mỹ, kanhgág ag mỹ Cristo kãmén jé. Cristo tugrĩn tóg ẽg mỹ nén (ũ) há tãvĩ han ke mũ, Topẽ ti. Hã tó sóg tĩ, vẽn kar mỹ.

⁹ Vẽn kar mỹ sóg kãmén tĩ, Topẽ tỹ nén han ke ti, ti tỹ ã tỹ vãsỹ nén to jykrén mũ tag han ke ti. Vãsỹ tóg to: “tag han jé sóg ke mũ,” he ja nĩgtĩ. Ti tỹ nén kar han tũg ki tóg to jykrén ja nĩgtĩ. Ti hã ne nén kar han'. Kỹ tóg, ã tỹ ẽn han ke to jykrén mũ ra tóg ù mỹ tó ja tũ nĩ ver.

¹⁰ Ûri tóg ve há tĩ ha, ti tỹ vãsỹ nén to jykrén mũ ẽn ti. Kanhkã tãn ag mỹ tóg ve há tĩ ha, tá pã'i ag mỹ, Topẽ krĩ há tag vỹ ve há tĩ ha, ti jykre há pẽ ẽn ti. Ag tỹ ù tỹ Jesus ki ge kỹ nỹtĩ ag ve kỹ ag tóg Topẽ jykre ki kanhró nỹtĩ, kanhkã tãn ag.

¹¹ Vãsỹ tóg to jykrén, Topẽ ti, ti tỹ ẽg pã'i tỹ Jesus Cristo tugrĩn nén (ũ) han sór mũ ẽn ti.

¹² Ti hã ki ẽg ge kỹ nỹtĩ, hã kỹ ẽg tóg jatun mỹ Topẽ mré vēmén tĩ ha. Ẽg kanẽ jun mãn ke tũ ti nĩ ha, Topẽ ti.

¹³ Hã kỹ sóg ãjag mỹ: “sỹ ãjag jagfy jagtar nĩ tag to jykrén tũg nĩ,” he mũ. Inh jagtar mĩ ẽkrén kỹ Jesus to krónh ke sór tũg nĩ gé. Ẽjag jagfy ke vẽn, isỹ nén vэг mũ tag. Inh jagtar tag tugrĩn ãjag tóg nén ù há venh ke mũ, ha vemnĩ.

Cristo tỹ ěg to há nĩ

¹⁴ Hã jé sóg Topě mré vēmén tĩ. Ěg jóg vĕ mỹr.

¹⁵ Ti tigrĩn ěg tóg rĩnrĩr nỹtĩ, ěprã ke kar, kanhkã tá ke kar ke gé, kỹ tóg ěg ki rĩr tĩgtĩ.

¹⁶ Kỹ sóg ti hã mỹ to vĩ tĩ, ti tỹ ã jykre tỹ ãjag tỹ tar' he jé, ti kuprĩg tỹ. Nén ũ kar vỹ tỹ ti tũ nỹtĩ, tar ti jĕ gé, hã kỹ sóg ti hã mỹ to vĩ tĩ,

¹⁷ ti tỹ Cristo tỹ ãjag ki ěmã han jé, ãjag tỹ ti ki ge nỹtĩn kỹ. Ti tỹ ěg to há nĩ vỹ tỹ ga ri ke nĩ, ěg tỹ ti ki jãrén jé, ka jãrén ri ke. Kỹ ěg tóg ti to tar nỹtĩ sir. Hã jé sóg ti mỹ ãjag tó tĩ gé.

¹⁸ Topě tỹ ěg kren han mũ vỹ ěg tỹ nén ve vãnh ri ke nĩ, ge ve ja tũ ěg nĩgtĩ. Kỹ sóg Topě mré vēmén tĩ, ti tỹ ãjag mỹ tag kãmén kãn jé, ti tũ kar ag mỹ ke gé. Nén (ũ) téj gy ri ke ti nĩ, nén (ũ) tãpér mág ri ke, kãgnó téj gy ri ke ti nĩ, nén (ũ) krỹg ja tũ ri ke ti nĩ, Topě tỹ ěg kren han mũ tĩ. Hã kỹ ěg tóg vĕsóg ki to jykrén kãn ke tũ nĩ.

¹⁹ Cristo vỹ ěg to há tãvĩ nĩ, tag to jykrén kãn ke tũ ěg tóg nĩ gé. Kỹ sóg Topě mỹ: “ha ag mỹ tag kãmén,” he tĩ, ãjag tỹ ti hã tỹ krĩn kỹ nỹtĩ jé.

²⁰ Ha vé, Topě hã ne tar tãvĩ nĩ'. Hã kỹ tóg ěg tỹ ti mỹ nén (ũ) to vĩn kỹ (tóg) ěg tỹ ti mỹ nén (ũ) to vĩ mũ ěn kãfór han ki kanhró nĩ. Kỹ tóg ěg tỹ nén (ũ) to jykrén mũ kãfór han ki kanhró nĩ gé.

²¹ Kỹ ěg tóg ti hã mỹ vĩ há han ke mũ, ěg tỹ ti ki ge kỹ nỹtĩn kỹ, ěg tỹ Jesus Cristo ki ge kỹ nỹtĩn kỹ. Ěg tỹ ti mỹ vĩ há han vỹ tũ' henh ke tũ nĩ. Hã vĕ.

4

Ěg tỹ Cristo mré tỹ ũn pir nỹtĩ

¹ Kĩ sóg ājag jyvĕn sór mũ ha. Se kũ inh jé nĩ, ěg Senhor tugrĩn, kũ sóg ājag jyvĕn sór mũ. Mũ há han sórmnĩ. Topĕ vỹ ājag kuprĕg, kũ ājag tỹ vĕnh jykre há han ke hã to vãsãn nĩ.

² Ājag rĕgre to: “ti kãfór vỹ tỹ inh nĩ,” he sór tũg nĩ. Jagnĕ mỹ komĕr hã vĩmnĩ. Jagnĕ to fe nỹtĩmnĩ. Jagnĕ to há nỹtĩmnĩ. Jagnĕ ajudar hemnĩ.

³ Topĕ kuprĩg vỹ tỹ ũn pir nĩ, kũ tóg ājag mỹ vĕnh jykre pir nĩm tĩ. Vãsãn nĩ, ājag tỹ vĕnh jykre pir ěn hã han jé, ājag tỹ krĩ kuprã nỹtĩn jé.

⁴ Topĕ kuprĩg pir ěn vỹ tỹ ěg kar jagrĕ nĩ, kũ ěg kar vỹ tỹ Cristo há ri ke nỹtĩ, jãvo tóg tỹ ěg krĩ ri ke nĩ, Cristo ti. Ěg kar mỹ ti nĕn ũ há han ke mũ, jagnĕ ri ke, ti tỹ ěg kuprĕg kũ.

⁵ Kũ ěg Senhor vỹ tỹ ũn pir nĩ gé. Ěg kar vỹ ti ki ge kũ nỹtĩ. Ti jiji hã tỹ ěg kygpe kũ nỹtĩ gé.

⁶ Ěg jóg tỹ Topĕ vỹ tỹ ũn pir nĩ gé, ěg kar jóg ti. Ti hã ne tỹ vĕnh kar krĩg mỹ ke nĩ'. Ěg kar tỹ tóg ã tỹ ũn han sór mũ ěn han tĩ, kũ tóg ěg kãkã nĩ gé, ěg jóg ti.

⁷ Cristo vỹ ěg tar han tĩ gé, ěg kar, ti rãnrãj to. Ũ mỹ tóg vĕnh rãnrãj ũ nĩm', nĩm' he tĩ.

⁸ Hã kũ tag tóg rán kũ nĩ, ha mĕ: “ti tỹ kanhkã ra tãpry kũ tóg ũn sigse kũ nỹtĩ ěn ag tatĩn vyr. Kũ tóg ěprã ke ag tar han mũ gé, ag tỹ ti rãnrãj han ke to,” he ja tóg nĩgtĩ, Tope vĩ rán ki.

⁹ Ha vé, ti tãpry kũ tóg ã tỹ kanhkã ra tĩg ke to hã tóg tére ja nĩ gé, ěprã.

¹⁰ Ũn tére mũ ěn vỹ tãpry mãn ja nĩ gé, kũ tóg kanhkã pãtén kũ tĩ mũ sir. Kanhkã pãtén kũ tóg kanhkã kri nĩ nĩ sir. Kanhkã kri nĩn kũ tóg nĕn (ũ) kar ki kanhró nĩ sir, ti tỹ ěmã kar vég nĩn kũ.

11 Ti hã ne ã rãnrãj kar to ãg tar han tĩ'. Ũ ag vin kũ tóg ag tỹ apóstolo hyn han. Ũ tỹ tóg ti tỹ ãg jyvẽn tĩ nĩnh ke han. Ũ mỹ tóg: “ũ tỹ inh vĩ mẽ ja tũ ag mỹ inh vĩ tónh tĩg nĩ,” he mũ. Ũ tỹ tóg igreja krêm pã'i han, ù mỹ tóg: “ũ tỹ igreja krêm vẽnh mãn tĩ ag mỹ inh vĩ kãmén nĩ,” he mũ gé.

12 Tag to tóg ãg tar han tĩ, ãg tỹ jagnẽ tar han jé sir, ti rãnrãj to, ãg tỹ tỹ ti jãvy nỹtĩn kũ, ti ve fag ke gé. ãg tỹ ãg rãnrãj tag ki króm kũ Cristo há ãn vỹ tar pẽ nĩ ha, ãg tỹ tỹ ti há nỹtĩn kũ.

13 Ti tỹ ãg kar tỹ vẽnh jykre pir han mũ ve sór vẽn, ãg tỹ ti ki ge kũ nỹtĩn kũ, ãg tỹ Topẽ kósin ki kanhró nỹtĩn kũ. Kũ ãg kar vỹ ãg rãnrãj to tar nỹtĩ sir, ãg tỹ jagnẽ mré tỹ ùn pir nỹtĩn kũ. Kũ ãg Cristo tỹ ãprã ke jykre kãfór nĩ ãn ri ke nỹtĩ sir, kũ ãg tóg komẽr hã ti tỹ nẽn kar han mũ mré ti tỹ nẽn to jykrén mũ ki kanhrãn kãn ke mũ gé sir, kũ ãg tóg ùn sanh há kanhró ri ke nỹtĩ sir.

14 ãg tỹ gĩr ri ke nỹtĩn kũ tóg ti mỹ há tũ nĩ. Gĩr ag ne ki kagtĩg nỹtĩ'. Kũ ag tóg, ag tỹ nẽn ù mẽ kũ ag tóg kãnhmar nẽn ù nón tĩ', nẽn ù nón tĩ', he' he tĩ. ãg tỹ ti vĩ to gĩr tỹ ki kagtĩg ãn ri ke nỹtĩn kũ tóg ãg tỹ ùn ón mũ vĩ kri nĩm ja há (tóg) tĩ, ãg tỹ ki kagtĩg nỹtĩn kũ. Ũ ag tóg Topẽ vĩ to ón tĩ. Ag tỹ ãg tỹ ãjag mré kygnẽ han sór vẽn. Vĩ há nĩ ve ag tóg nỹtĩ, kũ tóg ãg tỹ ag vĩ kri fi ja há tĩ sir.

15 Kũ tóg há tĩnh mũ, ãg tỹ Topẽ tỹ ki hã tó mũ ãn hã han kũ. Kũ ãg tóg jagnẽ to há tãvĩ nỹtĩnh mũ gé. Hã tỹ ãg tar nỹtĩnh mũ. Ti ki mog ri ke vẽn sir, ti tỹ tỹ ãg kri nĩ nĩn kũ, Cristo ti.

16 ãg tỹ tỹ ti mré ke nỹtĩn kũ ãg tóg tỹ ti há tỹ tỹ

ũn pir ên ri ke nýtĩ. Êg kar vỹ rãnrãj ke mũ, êg tỹ ti jykre pir to tar nýtĩ jé. Êg kar vỹ tỹ jagně mré ke nýtĩ. Êg kar tỹ Topě tỹ êg mỹ nén nĩm ja ên to vãsãnsãn kỹ êg tóg ũn sanh há tar ri ke nýtĩ sir. Mog jé êg tóg ke mũ, êg tỹ jagně to há nýtĩn kỹ.

Cristo tỹ êg mỹ vėnh jykre tãg nĩm

¹⁷ Kỹ sóg ãjag jyvėn sór mũ, êg Senhor tỹ inh mỹ: “ha ag jyvėn,” hen kỹ. Hã kỹ sóg ãjag mỹ: “ũ tỹ Topě ki kagtĩg ag jykre han sór tũg nĩ,” he mũ. Kórég ti nỹ, ag jykre ti, mỹr. Ag tỹ vėsóg ki nén to jykrén mũ ên hã han ag tóg tĩ.

¹⁸ Kutu mĩ ag mũgtĩ, ki kagtĩg ag nýtĩ. Hã ra ag tóg ki kanhrãn sór tũ nĩ gé. Hã kỹ ag tóg Topě tỹ êg mỹ vėnh jykre nĩm ên ki kagtĩg nýtĩ.

¹⁹ Kỹ ag tóg vėnh jykre há to é he tĩ. Mỹ'ãg vãnh ag nýtĩ. Ag vėnh kavėnh vỹ ag mỹ há tĩ. Vėnh jykre kórég tỹ ag kókég mũ ra tóg ag mỹ sér tĩgtĩ, kỹ ag tóg to krónh ke jãvãnh nýtĩ. Ke tũg nĩ, ag jãvo.

²⁰ Cristo jykre vỹ ge tũ nĩgtĩ, ki kanhró ãjag tóg nýtĩ.

²¹ Ti kãme ki kanhró kar ãjag nýtĩ ha, ti jykre ke gé. ãjag mỹ ag tóg kãmén kãn, Jesus jykre ti, êg tỹ ti ki ge kỹ nýtĩn kỹ nén han ke mũ ên ti.

²² Ti ki ge kỹ nýtĩn kỹ êg tóg êg tỹ vãsỹ nén han ja ên ri ke han mãn ke tũ nĩ ha. Tag mẽ ãjag huri. ãjag jykre si ên tovãnh kãn jé ãjag tóg ke mũ. ãjag tỹ ãjag jykre si jagma mũn kỹ ãjag tóg ãjag tỹ nén to én mũ ên hã han mũ ja nĩgtĩ ver. Hã ra êg tóg tag hã to ter ke mũ.

²³ Kỹ Topě mỹ to vĩmnĩ, ti tỹ ãjag mỹ ãjag jykre kurynh kãn jé, ti tỹ ãjag fe jãnhkrig jé.

24 Vēnh jykre tãg hã han sórmnĩ, Topẽ tỹ ěg mỹ vēnh jykre tãg nĩm mũ ěn ti. Kĩ ěg tóg ti ri ke nỹtĩnh mũ, kuryj ěg nỹtĩnh mũ ha, há ěg nỹtĩnh mũ, ti há ri ke. Kĩ ěg vēnh vĩ há hã han ke mũ.

25 Hã kĩ jagnẽ mỹ ón mãn tũg nĩ. Ki hã tómnĩ, jagnẽ mỹ. Jagnẽ mré ke vỹ tỹ ěg nỹtĩ, ěg tỹ Cristo há ri ke nỹtĩn kĩ.

26 Ājag fe tỹ gỹm ke mũ ra Topẽ vĩ mranh tũg nĩ. Ājag tỹ jagnẽ to jũ nỹtĩn kĩ kurã ũ jãvãnh sór tũg nĩ. Kutyg ke to hã tỹ há' hemnĩ.

27 Japo tỹ ājag krĩn sór mũ ra ti vĩ jẽmẽ tũg nĩ.

28 Vãsỹ ājag kãmĩ ũ vỹ ũ tỹ nén ũ pigju (ka)mẽ ja nĩgtĩ. Kĩ ěn han mãn tũg nĩ. Ājag rãnrãj nón ājag mũnh ke mũ ũri. Ājag nĩgé tỹ nén ũ há han nĩ, ājag tỹ ājag rãnrãj to nén (ũ) kar ve jé. To vãsãn nĩ, ti tỹ ājag mỹ kén jé, ājag tỹ ājag tỹ nén ũ tỹ ũn jagãgtar ag jagãgtãn jé.

29 Vēnh vĩ kórég tó sór tũg nĩ. Nén ũ há hã tỹ vēmén nĩ, ājag tỹ ājag vĩ tỹ jagnẽ tar han jé, ājag tỹ jagnẽ jykre kurynh jé.

30 Topẽ kuprĩg fe kaj han sór tũg nĩ gé. Topẽ vỹ ěg mỹ ã kuprĩg jẽnẽ, ti tỹ hã tugrĩn ěg nĩgjẽg jé, ěg krenkren ke to. Ti tỹ tỹ ěg jagrẽ nĩn kĩ ěg tóg ki kanhró nỹtĩ, ěg tỹ Topẽ tỹ ěg krenkren han ke kurã ěn tá krỹg mũn ki.

31 Jagnẽ to jykren kónãn tũg nĩ. Jagnẽ to krĩ rỹ han tũg nĩ. Ājag fe tỹ gỹm ke (ka)mẽ nỹtĩ tũg nĩ. Féfén tũg nĩ. Jagnẽ to vĩ kónãn tũg nĩ. Vēnh jykre pãno tovãnh kãn nĩ.

32 Jagnẽ to vĩ há han nĩ. Jagnẽ mỹ komẽr hã vĩmnĩ. Jagnẽ mỹ vēnh pãte fón nĩ, Topẽ tỹ Cristo tugrĩn ěg mỹ vēnh pãte fón ja ri kén.

5

Ēg jykre tãg

¹ Topě tỹ vĕnh jykre han tĩ ěn hã han nĩ, ãjag tỹ tỹ ti fe nỹtĩn kỹ, ti krĕ.

² Jagnĕ to há kar nỹtĩmnĩ, Cristo tỹ ěg to há nĩ ri ke. Ēg jagfy tóg vĕnh fĕg. Ēg tỹ Topě mỹ nén (ũ) pũn ri ke ti nĩ, ti tỹ ěg jagfy vĕnh fĕg mũ ěn ti. Topě mỹ nén ger há pũr ri ke ti nĩ, kỹ tóg Topě mỹ há tĩ sir.

³ Topě tũ vỹ tỹ ãjag nỹtĩ. Hã kỹ vĕnh jykre pãno tỹ vĕmén sór tũg nĩ, ãjag tỹ han sór tũ nĩ jé. Ēg prũ tũ mré nỹ, ěg mén tũ mré nỹ, tỹ vĕmén sór tũg nĩ, ãjag tỹ nén e hã tỹ vãsãn (ka)mĕ tỹ vĕmén sór tũg nĩ gé.

⁴ Kỹ jagnĕ mỹ vĩ kónãn tũg nĩ, jagnĕ to vĩ kónãn tũg nĩ gé. Fagrĩnh mỹ vĩ tũg nĩ gé. Nén ũ kavėj tỹ vĕmén tũg nĩ gé. Ēg tỹ tag tó kỹn pi(jé) há nĩ', ěg tỹ tỹ Topě krĕ nỹtĩn kỹ. Ēg tỹ nén tóh ken hã vĕ, ha mĕ: “ã tỹ inh mỹ nén jĕnĕg mũ kar tóg inh mỹ há nỹtĩ,” he jé ěg tóg ke mũ, Topě mỹ agradecer hen kỹ.

⁵ Tag to jykrén, ha mĕ: ũ tỹ ã prũ tũ fi mré nỹ mũ ěn, ũ fi tỹ ã mén tũ mré nỹ mũ ěn fi pi(jé) Cristo tỹ tỹ ěg pã'i nĩ venh ke mũ'. Ũ tỹ ã tỹ nén e hã tỹ vãsãn mũ ěn pi(jé) venh ke mũ'. Ēg tỹ vĕnh kãggrá to jãn ěn ri ke ti nĩ, ěg tỹ ěg tỹ nén e hã tỹ vãsãn mũ ěn ti. Ũ tỹ ge pi(jé) Cristo venh ke mũ', Cristo tỹ tỹ ěg pã'i nĩ ěn ti.

⁶ Ũ tóg ón kỹ ãjag mỹ vĕnh vĩ há tó sór tĩ. Ũ tỹ ge vĩ jĕmĕ tũg nĩ, ke tũ nĩ mũ ra Topě tóg ãjag to jũnh ke mũ. Ti vĩ mranh vĕ mỹr, kỹ tóg ũ tỹ ge to jũnh ke mũ.

⁷ Hã kỹ ag vĩ jĕmĕ sór tũg nĩ.

8 Vāsỹ ājag tóg vēnh jykre ki kuty hã han ja nĩgtĩ gé. Hã ra Topẽ tóg ājag mỹ vēnh jykre ki kurã ěn nĩm, ājag tỹ ti ki gen kỹ. Kỹ vēnh jykre ki kurã tag hã han sórmnĩ.

9 Ěg tỹ vēnh jykre ki kurã hã han kỹ ěg tóg jagnẽ mỹ vĩ há han ke mũ, vēnh jykre kuryj. Ki hã tó jé ěg tóg ke mũ gé, jagnẽ mỹ.

10 Věnh jykre tỹ ěg Senhor mỹ há nỹ ěn hã han sórmnĩ. Ěn hã to jykrén mág nĩ.

11 Kejẽn ājag tóg ũ vэг tĩ, hã ra tóg vēnh jykre ki kuty han tĩ. Kỹ ti mré han sór tũg nĩ. Ti mỹ: “kórég ti nĩ, tovãnh nĩ,” hemnĩ.

12 Věnh péju kỹ ag tóg han tĩ, vēnh jykre kórég ti. Ěg mỹ'a tóg tĩ, ěg tỹ ag tỹ nén han tĩ ěn ve kỹ.

13 Kejẽn tóg ag tỹ nén han mũ kri kurãg tĩ, kỹ tóg ve há tũgtĩ, ag tỹ nén han mũ ti. Kurã ki ěg tóg ti kórég nĩ ěn vэг tĩ.

14 Kỹ tóg há nĩ ha, ěg tỹ vēnh jykre kórég to: kórég ti nĩ, hen kỹ. Kỹ ěg tóg tovãnh sór ke mũ. Hã kỹ ěg tóg tag tó tĩ, ha mẽ: “Topẽ vĩ mranh sór mãn tũg nĩ. Nũgme ki kutẽ sór mãn tũg nĩ. Kỹ Cristo vỹ ã mỹ jẽngrẽ han ke mũ,” he ěg tóg tĩ, ěg jãnh kỹ.

15 Ějag tỹ nén han mũ to jykrén nĩ. Krĩ tũ nĩ sór tũg nĩ, vēnh jykre há ki vēnh kanhrãnh kỹ mũmnĩ.

16 Kurã kren tũg sórmnĩ. Nén ũ jagy ve jé ěg tóg ke mũ, hã kỹ tóg há tĩ, ěg tỹ kurã kren tũ nĩnh kỹ.

17 Ěg Senhor vỹ ěg tỹ nén ũ há han mũ ve sór tĩ. Kỹ ti tỹ nén (ũ) ve sór mũ tag hã to jykrén nĩ, ājag tỹ tag hã han jé.

18 Vinho tỹ vėsén tũg nĩ, tỹ vēnh pėnmãn tũg nĩ. Věnh jykre kórég vẽ, ěg tỹ nén ũ fa tỹ vėsén mũ ti, tỹ

věnh pénmăn mũ ti. Tope kuprĩg tỹ ẽg făn tag hă ne há nĩ'.

¹⁹ Jagně mré vēmén kỹ Topě tỹ jăn nĩ, ti jé tómnĩ, ẽg Senhor jé ti. Ti kuprĩg vỹ ẽg kanhrăn tĩ gé, ẽg tỹ ẽg Senhor mỹ nén tó sór mũ to, ẽg tỹ ti tỹ jăn há han jé. Ẽg tỹ ti mỹ: “há kar ti nĩ,” henh ke vễ gé.

²⁰ Ẽg jóg tỹ Topě mỹ ẽg tóg tónh ke mũ, ti hă mỹ ẽg tóg: “ă tỹ ẽg mỹ nén ven mũ vỹ há kar nỹtĩ,” henh ke mũ, ẽg tỹ ẽg Senhor tỹ Jesus Cristo jyjy tón kỹ.

²¹ Ẽg tỹ Cristo kamẽg kỹ tóg há tĩ, kỹ tóg ẽg tỹ jagně jykre mũ mũn kỹ (tóg) há tĩ gé, ẽg tỹ tỹ ti mré ke nỹtĩn kỹ.

Ủ tỹ jagně mré nỹtĩ fag jykre

²² Ủn tỹtá fag jé ăjag mén ag jykre mũ mũjẽg. Fag mỹ tóg ẽg Senhor ri ke nĩ, fag mén ti.

²³ Fi krĩ vễ, fi mén ti. Cristo vỹ tỹ ti ki ge kỹ nỹtĩ kar ag kri ke nĩ, kỹ ẽg tóg tỹ ti há ri ke nỹtĩ, ti tỹ ẽg kren han kỹ.

²⁴ Hă kỹ ẽg tóg tỹ ti krêm ke nỹtĩ, Cristo krêm ke. Ge ti nĩgtĩ, ủn tỹtá fag jykre ti. Fag mén krêm ke vỹ tỹ fag nỹtĩ, fag tỹ ăjag mén vĩ han jé.

²⁵ Kỹ sóg fag mén ag mỹ tag tó sór mũ gé. Ẫjag prũ to há tăvĩ nỹtĩmnĩ. Cristo vỹ ẽg to há nĩ, ẽg tỹ tỹ ti tũ nỹtĩn kỹ. Ẽg jagfy tóg vễnh fẽg,

²⁶ ẽg tỹ tỹ ti tũ nỹtĩ jé. Kỹ tóg ẽg kykũnh, goj tỹ ẽg kygpe kỹ, ti vĩ tỹ ke gé.

²⁷ Ti tỹ ẽg há nỹtĩ ve sór vễ, ẽg tỹ vễnhmỹ nỹtĩnh ke tũ vễ, ẽg kaga ri ke nỹtĩnh ke tũ vễ, ẽg kórég nỹtĩnh ke tũ vễ gé, ẽg sĩnvĩ tăvĩ nỹtĩnh ke vễ, ẽg tỹ tỹ ti tũ nỹtĩn kỹ. Cristo prũnh ke ri ke vỹ tỹ ẽg nỹtĩ.

²⁸ Tag ri ke han nĩ, ãjag prũ tỹ. Fag to há nỹtĩmnĩ. “Inh há ri ke vỹ tỹ fi nĩ,” hemnĩ, fag to. Ủ tỹ ã prũ fi to há nĩn kỹ tóg vĕso há nĩ sir.

²⁹ Vĕnh ki rĩr há han ěg tóg tĩ, jĕg ěg tóg tĩ, ěg tar nỹtĩ jé. ěg pi(jé) vĕnh kókén sór tĩ'. Cristo vỹ ěg tỹ ge tĩ gé. ěg ki rĩr há han tóg tĩ gé.

³⁰ Ti há vỹ tỹ ěg nỹtĩ, ěg kar, ěg tỹ ti ki ge kỹ nỹtĩn kỹ.

³¹ Tag vỹ rán kỹ nĩ, ha mẽ: “ũn gré tóg ã prũ fi to ã panh ré kỹ tĩ mũ, ã mỹnh fi ré kỹ ke gé. Ā prũ fi mré tóg tĩnh mũ. Fi mré tóg tỹ ũn pir nĩ sir, ti prũ fi mré,” he ja tóg nĩgtĩ, Topĕ vĩ rán ki.

³² Tag vỹ tỹ nén ũ sĩnvĩ pĕ nĩ. Kỹ tóg Cristo to rán kỹ nĩ gé, ti tỹ ũ tỹ ti ki ge kỹ nỹtĩ ag mré tỹ ũn pir nĩn kỹ.

³³ Hã ra tóg ěg mỹ rán kỹ nĩ gé, ěg tỹ ěg prũ fag to há nỹtĩ jé, ěg tỹ vĕnh ki rĩr há han mũ tag ri ke. Kỹ tóg fag mỹ rán kỹ nĩ gé, fag tỹ ãjag mén vĩ kỹ jémĕn jé.

6

Ēg han mũ fag to vĕnh jykre

¹ Kỹ sóg ãjag krĕ mỹ tag tó mũ, ha mẽ. “Ājag han mũ fag vĩ kri fimnĩ,” he sóg mũ, ag mỹ. Há ti nĩ, ěg Senhor jykren ha vĕ.

² Ājag han mũ fag kamĕg nĩ. Topĕ tỹ ěg mỹ tag tó kỹ tóg ěg mỹ nén ũ há tó mũ gé, hã vỹ:

³ “ã han mũ fag kamĕg nĩ, ã tỹ tĩg há han jé, ã tỹ ga kri tĩg mág han jé,” he ja tóg nĩ, Topĕ ti.

⁴ Kỹ sóg ũn sanh ag mỹ: “ãjag krĕ mỹ vĩ tar pĕ han tũg nĩ, ag tỹ ãjag to jũ tũ nĩ jé,” he mũ gé. Ājag krĕ

jyvĕn nĭ, ag mŷ ěg Senhor jykre kĀmĕn nĭ, ag tŷ mĭ mŭn jĕ.

Camarada ag tŷ Ājag patrĀo mrĕ nŷtĭ jykre

⁵ Ājag kĀmĭ ũ ag tóg patrĀo krĕm nŷtĭ gé, fagrĭnh mŷ ti mŷ ti rĀnhrĀj han tĭn kŷ. Ājag patrĀo vĭ kri fimnĭ. Ti kamĕg nĭ, ti to jŭrn kemnĭ. Ti rĀnhrĀj ki rĭr há han nĭ, Ājag tŷ Cristo rĀnhrĀj ki rĭr tĭ ěn ri ke.

⁶ Ũ tóg kejĕn ti patrĀo tŷ ti mŷ vĭ há han hĀ jĕ (tóg) ti patrĀo tŭ ki rĭr tĭ, ón kŷ. Tag han tŭg nĭ. Ājag patrĀo tŭ ki rĭr pĕ han nĭ, Ājag tŷ tŷ Cristo camarada nŷtĭn kŷ, Topĕ jykre tŷ Ājag mŷ sér nĭn kŷ.

⁷ Ājag patrĀo rĀnhrĀj ki rĭr kŷ mŷ sér nŷtĭmnĭ. Ājag tŷ ěg Senhor rĀnhrĀj ki rĭr vĕ, Ājag tŷ Ājag patrĀo rĀnhrĀj ki rĭr kŷ.

⁸ Ha vé, ěg tŷ nĕn ũ há han kŷ ěg tóg ti kaja venh ke mŭ, kanhkĀ tá. ěg Senhor vŷ ěg mŷ ti kaja venh ke mŭ, ti camarada ag mŷ, ag patrĀo mŷ ke gé, ti ki ge kŷ nŷtĭ kar ag mŷ.

⁹ Ājag kĀmĭ ũ vŷ tŷ patrĀo nŷtĭ, kŷ Ājag camarada vŷ nŷtĭ, Ājag krĕm. Ag to há nŷtĭmnĭ. Ag mŷ vĭ kónĀn tŭg nĭ. ěg Senhor vŷ kanhkĀ tá nĭ. Ājag pĀ'i vĕ, Ājag camarada pĀ'i vĕ gé hĀ ra, ũ tŷ kanhkĀ tá nĭ ti. Ti mŷ ěg tóg tŷ ũn pir nŷtĭ, tag ki ũn mág mrĕ ũn kĀsir ag.

Topĕ tŷ ěg tŷ Japo katō vĀsĀnsĀn jafĀ vin sór

¹⁰ Kŷ sóg Ājag mŷ tag tó sór mŭ gé ver, ha mĕ. ěg Senhor ki ge kŷ nŷtĭ to tar nŷtĭmnĭ. Tar ti nĭ, kŷ tóg ěg tar han ki kanhró nĭ gé.

¹¹⁻¹² Tag ki ěg vĕnh génh han tĭ, ěg tŷ Japo kato vĀsĀnsĀn kŷ nŷtĭn kŷ. HĀ ra Topĕ tóg ěg mŷ ěg tŷ ti kato vĀsĀnsĀn jafĀ nĭm tĭ. Kŷ mĀn nĭ, Topĕ tŷ ěg mŷ

ti kato vāsānsān jafā nīm mū ěn ti, kŷ Japo tóg ěg tŷ hē ri kenh ke tū nī. Tar jé ěg tóg ke mū ha. Ěg pi(jé) ěprā ke ag kato vāsānsān tī', ěg pi(jé) ěg mré ke ag kato vāsānsān tī'. Pā'i ag nŷtī, ũ tŷ ěg kato vāsānsān mū ag, hā ra ěg tóg ag vég tū nīgtī. Kuty tăn ag vĕ, ga to pā'i ag vĕ gé. Kanhkā krĕm ag ěmā nŷtī gé. Kórég kar ag nŷtī.

¹³ Kŷ măn kăn nī, Topĕ tŷ ěg mŷ nén tŷ ag kato vāsānsān jafā vin sór mū ěn ti, ājag tŷ ag kato vāsānsān to tar nŷtī jé. Kejĕn ag tóg ěg kato vāsān mág han ke mū. Kurā ěn kâ ag tóg ěg tŷ hē ri kenh ke tū nī, Topĕ tŷ ěg tar han kŷ, ti tŷ ěg mŷ ěg tŷ ag kato vāsānsān jafā ěn vin kŷ.

¹⁴ Hā kŷ tar nŷtīmnī. Ěg Senhor vŷ ón vānh nī. Ti ón vānh vŷ ěg vĕsóg fīn ja mág ri ke nī. Tŷ vĕsóg fīn ri ke han nī, ti ón vānh ri ke han to ken hā vĕ. Vĕnh jykre kuryj vŷ tŷ soldado tŷ camisa tŷ ferro ri ke nī. Ěn tu ri ke han nī, vĕnh jykre kuryj han to ken hā vĕ.

¹⁵ Ěg tŷ Topĕ vī sér tó sór mū vŷ ěg pĕn né, ěg pĕn to ró ri ke nī, ěg tŷ vĕnh kar mŷ Topĕ tŷ ěg krī kuprāg ke mū tónh ke mū tag ti. Ěn rīnh ri ke han nī, vĕnh kar mŷ Topĕ vī kāmén to ken hā vĕ.

¹⁶ Ěg tŷ ti ki rā kŷ tóg soldado tŷ vĕjy ven jafā ma tī ěn ri ke nī. Satanás tŷ ěg kato vāsān kŷ tóg ti tŷ no tŷ ěg to pĕg grug ri ke nī. Ěg tŷ vĕjy ven jafā tŷ vĕjy ven kŷ tóg tŷ nhyn ke tī, ti no gru ěn tŷ. Ěg tŷ Jesus ki rā to ken hā vĕ.

¹⁷ Ěg kren han ke vŷ soldado sāpe ri ke nī, sāpe tŷ ferro ěn ri ke. Kŷ Topĕ vī vŷ rógro ri ke nī gé. Topĕ kuprīg vŷ ěg mŷ kāmén tī', Topĕ vī ti. Topĕ tŷ ěg mŷ Japo kato vāsānsān jafā vin ke mūn hā vĕ.

18 Kÿ Topě mré vēmén nĩ gé, ti mÿ nén kar to vĩmnĩ. Ti kuprĩg vÿ ěg jagfy vĩ tĩ gé. Topě mré vĩ to krónh ke tũg nĩ. Ěg tÿ to krónh ken kÿ tóg ěg nũr ri ke nĩ sir. Ke tũg nĩ. Ěg mré ti ki ge kÿ nÿtĩ kar to vĩmnĩ.

19 Kÿ inh jagfy ti mré vēmén nĩ gé. Topě vĩ tó sóg tĩ. Kÿ inh mré to vĩmnĩ, sÿ tó há han jé, isÿ inh kato vāsānsān mũ ag kamĕg tũ nĩ jé, isÿ vĕnh kar mÿ Topě tÿ nén han sór mũ ěn kāmén há han jé, vĕnh vĩ sér ěn.

20 Topě vÿ inh mÿ tag nĩm ja nĩ, sÿ han jé, hã ra sóg ver se kÿ jĕ. Kÿ tóg sÿ ag kamĕg tũ nĩnh há tĩ, sÿ Jesus kãme tó kãn jé, sÿ ti tÿ inh mÿ: “ha ag mÿ kãmén,” he mũ tag tó kãn jé.

Paulo tÿ Tíquico jĕnĕnh ke

21 Kÿ tóg inh mÿ há tĩ, ãjag tÿ isÿ nén ve ja tag mĕ kãn jé, isÿ nén han mũ mré hã. Hã jé sóg ãjag mÿ Tíquico ti jĕnĕnh ke mũ. Ěg régre ũ vĕ gé, iso há tavĩ ti nĩ, Tíquico ti. Ěg Senhor rãnrãj han ti tĩ, ti to krónh ke tũ ti nĩgtĩ.

22 Ti hã vÿ ãjag mÿ inh kãmén ke mũ, ti tÿ ãjag fe tÿ há' he jé. Hã jé sóg ti jĕnĕnh ke mũ.

23 Ěg jóg tÿ Topě jé ãjag krĩ kuprãg, ěg régre kar ag mré hã. Ti jé ãjag tÿ jagnĕ to há kar han. Ti jé ãjag tÿ ti ki rã há han, ěg jóg tÿ Topě ti, ěg Senhor tÿ Jesus Cristo ti ke gé.

24 Topě jé ãjag tar han, ũ tÿ ěg Senhor tÿ Jesus Cristo to há nÿtĩ ag kar, kÿ tóg tũ' he jãvãnh nĩ, ěg tÿ ti to há nÿtĩ ti.

Hã vĕ.

Topẽ vĩ rá **New Testament in Kaingang (BR:kgp:Kaingang)**

copyright © 2011 Wycliffe Bible Translators, Inc.

Language: Kaingang

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kaingang

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 18 Apr 2025 from source files
dated 29 Jan 2022
16af52c8-0e45-5e91-b36c-cd314d36d7fc